

續修陝西省通志稿

第四十冊

卷六十九至七十

續修陝西通志稿卷六十九

名宦六

知府

郭維遲字仲昭一字蘭坡河南洛陽縣人嘉慶戊寅舉於鄉癸未成進士以知縣分陝西歷任興平涇陽褒城長安知縣寧陝廳同知同州興安漢中西安知府兼署陝安道爲人勤慎遇事明斷尤以矜慎庶獄爲先務讞詞多所手定遇有疑案數十年不決者維遲竭數十日夜之力皆得其情實故自作令以至爲守案無留牘民無冤抑以維遲形貌魁偉髯長過腹一時有髯佛之稱其知涇陽也大兵過境措辦經費商民無累廉潔自飭留心風俗捐俸建節孝坊涇人載之邑乘尋調長安又值西師凱旋其所籌備一如在涇時他如息械鬪修城隄釋淹禁清積案皆爲人所稱頌然均

以未克久任爲憾獨蒞寧陝最久寧陝居南山最深處宵小易藏
維通行保甲法每月抄親赴鄉堡稽查野無盜警又以山路險絕
登陟者率戰栗不能進復捐廉平治四百里崎嶇悉成坦途行旅
稱便時值饑荒復出廉賑濟富戶均觀感樂輸活飢民無算所蒞
之處振興文教品第諸生課藝優給膏火之資一時登科如王禹
堂呼延甲皆所得士至今士林艷稱之然自奉儉約廉奉所入輒
以分贍戚友之貧乏者在陝西十七年竟以勞卒官時道光十九
年三月也奏祀寧陝名宦祠無子以兄子岷生嗣焉

郭維
滄陽
墓誌
參

徐棟字致初直隸安肅縣人嘉慶己卯舉人道光壬午成進士授
工部主事擢都水司郎中究心吏治以爲天下事莫不起於州縣
州縣理則天下無不理稱州縣之職不外於更事久讀書多然更
事在既事之後讀書在未事之先則讀書尤要乃滙諸家之說成

牧令書二十三卷又以保甲爲庶政之綱法甚約而治甚廣自明王守仁立十家牌之說後世踵行以之彌盜此未知其本也於是集諸家之說明其利弊別其難易審其功效成保甲書四卷略謂天下一大保甲州縣一小天下天下非一人所能理於是有省有府有州縣州縣亦非一人所能立於是有鄉有保有甲其勢異其事同其制異其道同云云識者以爲名言尋授陝西興安府知府累調漢中府西安府所至行保甲皆有成效興安郡城三面臨漢棟補修惠春石泉兩隄高其基加於舊五尺咸豐中水冒舊隄二尺民皆驩然念徐公力城內有糧卡禁糧下運棟以興安地卑溼穀屯積多霉變旣不能久儲又不能出境圖利者改種菸葉藍靛然歉年每乏之食乃設策弛禁小民便之後以病歸久之復奉命督辦本省團練修直隸省城得旨嘉獎同治元年有詔錄用以老病

辭尋卒祀興安名宦祠所著牧令保甲書曾刊於關中其凡例云是書成於戊戌重訂於戊申中間頗多增損故所載有戊戌後文字道光年間林鄧兩公相繼撫陝吏治稱盛一時者以有棟此書爲之準繩規矩也

清史循吏本傳
牧令書序

鮑珊字滄碧一字鐵帆安徽歙縣人少孤依兄桂星學入順天宛平庠食餼嘉慶丁卯舉順天鄉試改歸原籍己巳成進士十七年由咸安宮教習選授陝西大荔縣知縣珊明慎而勤日理百牒兩造各輸情無呼冤者南鄉民多回教與漢睚眦輒械鬪鬪必千百人巨案山積前之官此者率勇武健而不能勝珊聞有鬪者即親往風諭之情理洞然各解散去在任十年無械鬪案縣屬賀家窪有游民作道士裝施符藥於山西境山西人誣以邪教晉撫驟入奏奉旨交陝西巡撫查辦撫軍檄候補知府某來縣密偵某將以

爲功欲盡縛村民興大獄民大驚擾珊力辨其冤某怒詬以匿大逆珊笑不爲動某以嚴搜無所得轉爲好語屬珊珊親鞫之薄懲一人而釋其餘村民獲全釀金爲珊建生祠珊力止之未幾調渭南縣知縣擢乾州直隸州知州時回疆不靖徵調絡繹將帥弁兵及軍械駝馬糧餉過境者日夜不絕自軍興迄凱旋逾三載他郡縣不勝擾珊悉心籌畫務爲民節費而過者帖然有一人以供億不豐怒形辭色珊正容折之其人慙阻轉謝過而去乾屬之永壽縣地瘠車少大府檄乾出車赴永壽之監軍鎮備用計往返百里珊燈下自屬稿申大府反復辨論大府韙其言遂止乾舊有差局珊頻加節縮歲省三千緡著爲例乾民賴之興安大水郡城爲墟郡屬八廳縣同日被淹山瘠民貧流離滿目大府以南山奧區素易搔動擢珊爲興安府知府珊抵任凡所設施仿古荒政之遺而

變通之尤以輯睦文武爲急務郡爲南山巨鎮駐重兵以總兵統之珊與總兵祝廷彪交最契凡事和衷共議并不袒兵吏不袒民各持其平兵民如一切一切撫流亡禁侵掠彌盜賊咸資其力民以是安堵秋稼熟矣大水又至不可支柱乃親詣會垣籲大府發帑數萬金粟數萬石平糶兼設粥廠張皇補苴勸大戶各鎮其鄉鄰不足者捐廉助之十五閱月稟牘文移皆手自屬稿委曲周詳積累盈篋鬚鬢爲之頓白十四年二月卒於興安任所年五十有六珊官秦二十餘年所履皆豐壤而性好施予戚族故舊凡求助者無不應或不待求而厚助之事之不便民者每自出已資以紓民力用是負債愈萬盤屋路先生德贈以詩曰愛君別有高人處不把黃金作宦囊蓋紀實也子三廉庠康廉官兩浙雙穗場大使庠

康同中己亥順天鄉試舉人

大荔縣志參檉花館文集鮑君
墓志銘乾州續志渭南縣志

杜薇之字浣花雲南昆明縣人由進士官陝西道光十年授榆林府知府和衷率屬勸民植桑紡績又移修義倉於碑樓巷以避潮濕相度東山龍神祠東偏創建文昌奎星樓以培郡城文風道光十年十一月有旨命署陝西鹽法鳳邠道卒於任所囊橐蕭然藉同官賻送之資始得歸櫬滇南云先薇之數載任榆林守有熊常鐔者字聲谷江西鉛山縣人進士道光四年爲榆林府知府重修書院捐助膏火設立義倉留養局勤惠廉能循聲懋著累官至廣東布政使二人皆有清名榆林郡人咸稱述焉

吳鳴捷字友聲一字蔗鄉安徽歙縣人嘉慶戊午舉江南鄉試辛酉成進士以知縣分陝西時年三十有七乞假南旋遨遊吳越間十年乃之陝署岐山補高陵又署長安調咸陽又調咸寧擢知鄜州署同州府代理延安府署興安府卒於官年七十有三計官陝

三十二載杜苞苴省徭役獎節孝恤臯疾振人文謹隄防遇事表裏洞澈而用意渾厚不爲察察之明子子之義當時若無事然甫去則人皆思之尤神於聽斷瞭如目覩佗邑有疑獄大吏輒委鳴捷至則一鞠而定永無反復自守廉潔而性喜任俠瘠己肥人用常不足凡有求者無不與或不待求即與之引見者二皆稱貸以往稱貸以歸四川總督鄂山牧廊時虧倉粟求助於同官乞鳴捷假二百金鳴捷統計其數曰助不敵虧奈何因倍與之潼關廳桐城張聰賢卒家屬不能歸時鳴捷典質一空計無所出乃自支養廉八百金盡付之時人語曰善哉此舉真不愧捐廉矣宰高陵時有循聲巡撫富呢楊阿甚器之平生好宏獎人材禮羅所致多知名士丁卯分校鄉闈蓋屋路德出其門德道義文章冠當時後卒爲名儒鳴捷官陝久囊橐蕭然其卒也柩寄蕭寺中眷屬在廊歸

無貲德爲請於諸大府暨僚友故舊集五千餘金送柩迎眷償其宿逋復於中取千金買田蓋屋歲取其租供其孫福先誦讀得不廢書鳴捷蒞鄜州重輯鄜州志若干卷子曰曾純先卒曰曾紹亦沒於陝曾純字亞農援例爲縣丞著有畫苑集孫福先改名效璘入陝西籍中咸豐辛亥舉人官知縣

高陵縣志
花館文集
吳墓志銘
鄜州志

劉建韶字聞石一字克和福建長樂人道光乙酉拔貢生中本科舉人乙未成進士以知縣用發陝西署寶雞知縣充丁酉科陝甘鄉試同考官補韓城知縣整頓保甲創設十家五保牌輪流巡柝每雞鳴必躬稽其勤惰爲龍門書院立課章碑又自招生徒按日講貫復疊充鄉試同考官尋署孝義同知調補臨潼知縣大計薦卓異升定遠廳同知復調充丙午午科鄉試內監試旋因捐輸奏准開缺以知府留陝補用其任孝義廳也剔弊除奸潔己奉公維持

風化愛民好士有斯民父母之稱尤能振興文教士民頌之久之
署興安府知府榆林府知府嘗以爲彌盜莫善於保甲故於保甲
尤能實事求是又爲之說以發明之文繁不載著有宜蘭室詩文

集若干卷

徐氏保甲書關中同
官錄孝義韓城兩志

吉年字秋畬鑲藍旗滿洲人道光壬午進士性嚴毅學問淹雅有
幹濟才初授同州府知府蒞任數載政簡刑清勤於課士公餘每
游藝射圃習勞遇早步禱輒應屬縣有疑讞常策騎親往呼兩造
立爲剖判不聽株連不煩供億曰寧自勞苦毋累民也時城垣久
圯因移檄各屬捐助刻日興工完築歷二十年至同治初回民作
亂環攻卒保無恙蓋先事預防之力居多云同郡人民追感其德
於多隆阿祠內與朱元慶呂儁孫二字並設位祀之

同州府補志
暨同州府志

呂儁孫字曼叔江蘇陽湖縣人由廩貢生中道光丙午舉人以知

府分陝西初署漢中府知府再署同州府知府舊章豐登書院官課膏火豐而堂課膏應者絕少儁孫量爲更定增課經學古學由是文風日振同治元年回亂奉檄往查以朱元慶代之及賊至協力拒守全城以安復署同州府事益自鼓勵募勇丁繕守備難民入城率多傷病爲擇隙地搭蓋蓆棚日給粥餅兼施方藥全活無算城上造更房數十座守陴者得免暴露防禦益嚴援兵雲集慮其驚動居民親自拊循凡軍營所需糧草軍火悉力措辦不令擾累欽差大臣勝保師至欲提豐登馮翊兩書院膏火息爲餉儁孫力爭乃止儁孫兩攝郡篆精明幹練正己率屬訊斷明決馭吏役特嚴而接士溫恭有度人咸稱之是年調任西安府知府署鹽法道督糧道久之擢潼商兵備道加按察使銜九年九月卒於官入祀名宦祠事蹟宣付史館子三懋深知府用陝西候補同知懋彰

續陝西通志
卷之十九
六

懋緒

同州府續志關中同官
錄顧壽楨孟晉齊文集

謝質卿字蔚青江西南康縣人道光二十七年由舉班選授朝邑
縣知縣調署長安知縣升乾州直隸州知州到官修城濬隍興復
濠上橋梁頗稱完固回逆之亂鄰境民多逃入寺舍幾不能容而
賊歛忽不時至質卿嚴守禦撤城下牆屋募勇壯延技師朝夕訓
練增築城上礮墩回逆游騎來輒以銃擊之時城邑被陷者甚多
而乾城獨完久之擢興安府知府再遷潼商道光緒四年三月以
病告歸旋卒著有轉蕙軒詩存八卷質卿任乾最久去時有留別
乾陽士民詩自注云屢以民困丐免捐輸捐置義地掩埋骸骨又
云時方設局採訪節義去歲瘟疫盛行舍藥施濟頗多全活末云
哀鴻未集中心歉駑馬過征別路長贈策各宜忠孝勉懺除災難
籲穹蒼言婉多風左氏云忠信之長慈惠之師質卿殆近之焉

乾州

參越縵堂日記轉蕙軒
存稿咸豐己未同官錄

李煒字蘭舟一字惺夫湖北興國州人由廩生中道光甲午舉人
庚子成進士以知縣用發陝西署山陽補城固甲辰恩科充陝甘
鄉試同考官尋署岐山富平充丙午科陝甘鄉試同考官丁憂歸
服闋旋陝復攝富平五年調署咸陽旋補富平調長安煒饒吏才
一切幹辦所至有聲林則徐撫陝時稱煒爲關中良吏第一同治
元年回民構釁時煒在長安團練鄉勇安置難民客軍紛至諸倚
煒取辦以勞保知府檄署同州府未赴任卒岐山志稱煒器局端
雅明幹有爲雖任岐邑僅期年而籌添書院欸項改定公局章程
皆得政體士民立碑以紀其實云

湖北通志參富
平岐山兩志

撫民廳

蓋鉅字式如山東蒲臺縣人方泌之子道光壬午進士以即用知

縣分發陝西補延長縣知縣陝安道嚴如煜器其才請諸大吏調知石泉縣事蒞石三載務整飭一切禁暴安良不事姑息勸勵學校日親訓課以故肄業諸生人爭奮發調大荔縣去之日石民攀轅遮道有赴省懇留者抵大荔任廉明慈惠決獄時平心聽之任兩造爭辨覲其間一言而決故被斥者退無閒言會軍興大軍出潼關各縣例協濟車馬車馬必先數日到一兵一車民費不貲鉅令按期至並援故事一車載五兵兵大譁鉅不爲動徐見其帥折以理帥麾兵去省賦數千金而尤勤於校士歲科試拔取皆知名士士林感服南鄭故多回民率與漢人械鬪每釀巨案附近居民苦之鉅嚴立條約其尋釁者重法治之回民皆畏服不敢犯漢民賴以安業又膂力過人時以拳技習勞遇匪棍人莫敢擒者每親往掩捕之匪輒棄械就縛無敢拒者大荔北門恒閉相傳開之官

不利鉅初至時方久旱啟北門而雨至人皆服其神在大荔三年興利剔弊無一非爲民計者尋升佛坪廳同知去任老幼垂涕送

之後又署漢中知府而卒

司州府志參
大荔縣續志

賀仲城字美恆一字葛山湖南善化縣人父壽齡力學早世仲城少孤育於諸父倜儻有志以廩貢生報捐知縣分陝西時回疆用兵大府檄赴甘肅襄辦糧臺事竣歷署華陰城固洵陽沔縣知縣題補褒城奏調長安升留壩廳同知兼權漢中同州兩府在洵垂二十年凡歷縣六廳一府二所至有聲於留壩尤習留在萬山中最易藏奸又當鳳嶺柴關之衝爲川陝通衢群不逞之徒往來必經仲城陰籍其名姓里居出沒蹤跡有事按名收取無所得脫爲政持大體於農田水利諸政講求素裕而緝捕尤力嘗云今之州縣莫切於賑荒緝盜荒政修民不爲盜即有亦易緝是時方有西

事又連年大水飢民乘之所在滋擾仲城所履多繁劇災區於華陰值西師過境儲待豐備民不知兵旋偵獲因姦謀殺叔父遠竄襄鄖之某甲伏法人心大快風紀肅然於城固偵知土匪糾黨五百餘人潛伏三谷謀亂尅期解散旋以應運興安賑米五千石照二穀一米例分起撥運力除碾戶粗去糠粃之弊匪黨無所藉口全境以靖於洵陽請於府得米六百餘石減糶煮賑復立鄉助法捐貯各村以時收放而貧富相安得以不擾於褒城鄰境同時告災相率請賑仲城獨以褒距省遠躬先履勘出私緝買米散給全活無算省符下詢實乃大歎服又以餘力改修褒谷棧道八千餘丈樊河橋鐵絙七十四丈以便行路迨由長安奏升聲譽日起自擒獲甘肅奉旨嚴緝之巨盜劉得祿等四人大吏以聞朝廷將待以不次而仲城以病遽不起矣仲城有吏才習律令生長名家故